

愚山詩集

施愚山先生學餘詩集卷之十六

七言古

青藤引

青藤書屋徐文長讀書處藤大如斗徐自稱青
藤道人後爲陳章侯宅今陳歿數年而青藤爲
風雷所壞感而賦之

青藤青藤爾生幾百載幾見桑田與滄海霜根拔地石
谿訝翠葉垂天雲鬣隼下根伏積雪上幹棲真宰小山
叢桂不敢望若木扶桑勢相抗葛陂仙叟騎作龍襄陽
老顛拜爲丈千年盤鬱精靈開腹空火起轟奔雷嵯峨
石柱倒燦爛金臺摧豐隆行歎息屏翳坐徘徊嗟爾青

藤胡爲乎頽哉昔日天池讀書處狂歌大叫倚藤樹又

聞丹青老蓮子

陳章侯自號老蓮

解衣醉卧呼不起蘭亭客散

纏荆榛風吟雨嘯空悲辛自古才人所託迹會能白日
生霹靂青藤青藤我欲南登石梁遊金庭策爾爲杖兮
爾騫騰

象山謠

懷同年顧雙丸也

象山令居東海中往來飄忽隨天風夜見魚眼波濤紅
捨舟登岫豺虎窟伏莽健兒復馳突夾路杈枒堆白骨
城中罷市無居民秣馬無粟爨無薪冠蓋使者坐生嗔
爲語象山令請君勿太息昔何白哲今鷲黑挂冠高枕
何可得

怪風行

海州白晝黃塵昏烈風倒海搖山根城崩一角塞城門
兒童大叫相追奔有客擁衾臥高閣屋瓦翻飛如卷籜
驚禽駭獸無處所黃輿欲裂蒼穹薄海濱自昔多颶風
父老祇今皆錯愕孤城屢破血痕腥風鶴喧呼猶膽落
天豈驅除此子遺茫茫吹盡成廣漠風伯飛廉有倦時
願君返轡收靈旗高山大壑無轉移於乎四海十年甲
兵不得息風塵瀕洞何終極

海東謠

海東旱三年矣施子過之減騶併食歌促急不
成聲竊比於海人之謠云爾

海中陰火燒扶桑專車魚骨擎爲梁截骨爲臼春無糧
囑兒忍饑勿夜哭牆頭跳叫多豺狼

二

塲丁鹺賈無完屋一握黃梁鹽十斛差科絡繹相驅逐
前日路死骨未收且緩須臾莫鞭扑

三

黃蒿颯颯風啾啾遺黎眼枯無淚流賣男得錢新買牛
墾荒給種聖人出何時親幸海東頭

太函山房歌寄汪文岫

是司馬伯玉先生孫

司馬文章射雕手武庫森森無不有左拍歷下右婁東
奇書萬卷皆蝌蚪騰驤後勁有開孫墨汁沉酣作杯酒

爲求嘉饌開心脾
買得銀鱗箸未下水盤移贈及朝炊
同心復有季黃門
越陌相存如弟昆
江陰子鱗來千里
蘭陵美酒分一尊
病夫七箸猶未健
感此意氣加盤飧
吾豈小人懷口腹
朋友膠漆古所敦
況有新詩療饑渴
五侯之鯖何足論

家叔生日聞留滯山陰有作

我今通籍七年餘
服官僅滿三百日
野人不合遊金門
半是艱難半愁疾
往事傷心勿復言
坎壈只今猶未畢
風塵馬上倦開顏
兒女夢中來繞膝
薔薇花盡榴花開
愁劇佳辰罷舉杯
冠蓋滿堂非骨肉
富貴於我何有哉
長安達官賤珠玉
秋曹八口憂饘粥
憂能傷人人易老

歲月遷流如轉轂別時我叔淚霑衣白頭重卧剡溪曲
一觴寥濶三千里顧影茫茫淚相續何如歸向敬亭雲
手種桃花偃茅屋

贈湘潭王山長兼謝其作畫障

騷人昔日沈沅湘不意天壤之間有王郎此語雖唐突
贈君殊不妨男兒詞翰皆礪硯安能低頭逐隊無短長
愛君有膽大如斗看君用筆如用帚狂吟潑墨勢離奇
豎儒睨笑驚且走我獨披圖盤礴久楚山峭湘水愁風
林湛湛九疑秋記我當年腸斷處扁舟曾向此中遊

送王懷人亦世兄弟歸漢陽

王家兄弟天下少高歌激楚長安道武昌明月洞庭雲

超然出入君懷抱
繁花落盡秋草腓
鸚鵡洲邊鷗鷺飛
弱冠上書成老大
敝裘何處尋漁磯
莫學蕭條漢陰叟
掉頭抱甕都忘機

贈嵇叔子孝廉

嵇子淮南客
相逢在燕市
酒酣耳熱髯盡張
怒決黃河天上水
爭言叔夜是前身
誰識荆軻猶未死
頻年獻賦又空還
蒲帆歸去幾人間
他日高歌攀桂樹
思君倘在八公山

簡方吉偶同年索畫

故人能詩復能畫
胷中丘壑籠十洲
丹青磅礴渾漫興
人言君是顧虎頭
我有鶯溪絹一疋
領取烟巒挂蓬室

五日一石十日水如何三月不下筆祇今我病愁蹉跎
江上青山歸夢多安能突兀置我層巖絕壑間使我青
鞵黃帽影婆娑與君酌酒爲君歌聞君宦遊氣豪壯曾
踏龍湫與雁宕不妨潑墨爲此圖臥遊想像一惆悵

張穉恭爲余圖白雲樓時奉使祀河歌以送之

我家宛水濱結廬敬亭麓敬亭山上多白雲飛來飛去
繞茅屋別來京洛心悠悠一官又臥白雲樓拄笏西山
來爽氣掉頭不敢干公侯張子灑落塵中仙贈我琅琅
金石篇曾吞廣陵濤八九噴作華山千丈蓮

張關中人
流寓廣陵

懷余百尺樓頭臥揮毫遣興成雲烟長松古柏半不見
迷離碧靄連蒼天馮闌獨立者誰子側耳髣髴聞清泉

如君畫手不易得白石枯枝淡無墨亂山落紙疾如風
坐客驚看皆失色君今四壯指黃河竹西鼓吹重經過
白馬玄圭告成事黃鸝紫燕春風多噫嘻淇園竹盡瓠
子歌宣房築室今如何歸來圖畫獻天子與君更醉
金叵羅

淮南行送張鞠存同年

張子天官之大夫文章冰鑑當代無鳳池螭陛舍香趨
峻岫玉樹凌天衢少年努力策高足胡爲拂袖歸江湖
神龍矯首不得志有時戢角走平地人生富貴風中塵
蓬轉沙飛愁殺人要津挂冠那可得不爾左遷亦抽身
聞說淮南多桂樹枝葉連蜷暗朝暮半畝草堂桂樹邊

八公蹕蹕下烟霧張子自是張季鷹秋風未動思萸羹
畱侯晚逐赤松子彭澤豈辱陶淵明如淮之酒百斛傾
高歌激楚金石聲東山捉鼻恐不免請君大笑淮南行

送張友鴻歸雲間

并序

施子官比部與時彥諸公數集友鴻所張譙明
許菊溪趙錦帆顧介石吳六益沈繹堂皆詞學
相友者也居無何或遷或出友鴻又別我去僕
雖病其能無一言爲作長歌壯之矣

張子十日不相見一日別我去如箭把酒畱君君不畱
笑索新詩當祖餞京華旅食似君稀文采風流誰不羨
丹青已入明光宮詞賦還傳柏梁殿雲間才數不可當

吳子沈子爭翱翔牆東招手顧子出春燈夜雨傾壺觴
中州三子各意氣迴鞭聯轡登君堂祇言醉歌共朝夕
誰知轉眼愁河梁燕吳秦豫各分散東西咫尺成參商
張子別我情更苦躊躇把袂九回腸平生好客哀王孫
鷓鴣典盡開金樽衆中許我獨知己紛紛交態聲欲吞
長安謁客如叩關浩然鼓枻歸江村辟疆園亭頗不惡
柴桑松菊今猶存沂吳淞兮斫鱸膾舉薜荔兮紉芳蓀
回首它年西北望應憐方朔老金門

苦雨篇

階前不合蛟龍走瀑布飛騰穿戶牖屢驚驟雨怒翻盆
更看飛雹大如斗九衢萬戶皆洪濤蒼穹下墜埽沱高

愚山先生詩集 卷十六
垣傾壁塌知何限但聞野哭聲嘈嘈我棲客館作官署
屋漏更無容膝處兒童狼藉坐泥中疊架匡牀暫箕踞
老夫食性怕炊煤河魚疾發腹轟雷寸薪尺璧那可得
蛙生塵釜空徘徊北嘗苦旱南苦雨防河掘盡中州土
竹竭山平瓠子愁幽燕又見商羊舞淫淫日夜憂如何
海陬未息長鯨波

醉後歌訓趙錦帆兼呈丁飛濤

臥疴一月生秋草久雨柴門跡如掃趙君立馬下階前
尊酒論詩恣傾倒君詩橫絕天下知掉頭不數雕蟲兒
同舍爲郎執余手愁中相視開鬚眉才雄氣莽天地窄
老蛟怒吼長河坼謂余能不操吳音直是中原一詩伯

我友敬禮來西陵揮毫爛熳如雲蒸君言西署吾曹在
三分割據爭峻嶒狂呼不顧旁人笑游俠何妨狎屠釣
王李諸君官陸沈姓字千秋日照耀聞君作令賦甘泉
七載囊中無一錢三年執戟顛毛白當塗誰復知其賢
人情惜官不惜才揚雄賈誼終塵埃請君放筆且掩口
明日同歌歸去來

歷下送畢四世副使姚榕似運使同赴官嶺南

君不見太行王屋參天起畢侯墮地稱才子又不見茗
溪浮玉生清光姚家兄弟爭翱翔當年臥病白雲樓曾
同畢子凌高秋手持黃紙向西粵姚生努力相綢繆兩
賢骯髒誰能伍萬古心曾一朝許漂泊聯翩出國門齊

州忽集同心侶豪氣真看岱岳低
懽情頓釋樊籠苦左提右挈太殷勤
把臂酣歌海內聞鹽書一旦九重下
星輶雙指羅浮雲驪駒催人不得駐
舞絮回風暗如霧羊城碧草秋更香
梅嶺寒花冬滿樹南粵山川真壯遊
翡翠明珠百不愁絳襦仙人天下美
銅柱孤標萬載留丈夫跼蹐眼前地
何如嶺嶠看滄洲滄洲回首穆陵關
迢遞風烟不可攀一杯祖爾嵒湖上
流波別淚兩潺湲

今日行畱別王偉樹廉使

王偉樹按察粵西余奉使相接懽甚及北歸聞
桂林陷度王不免次豫章值其子往省覲路阻
慟哭而返今六年矣王遷粵東左司歸里亡恙

而其子已客死賦今日行

今日相逢是何日握手開尊重促勝回想桂林奔迫時
欲言嗚咽聲不出桂林疇昔何殷勤忘年爾汝成膠漆
許我新詩逼古人執卷高吟散愁疾星巖仙洞憶同遊
惆悵懽娛忽相失灘江烽火渡豺狼城頭流血殷瀟湘
君在圍城余間道天南地北兩茫茫令子中途驚問訊
招魂引領斷人腸誰知玉樹轉摧折白首逢君歸故鄉
龍鬚華席鸚鵡研綈袍嗷嗷不可忘人生聚散亦何嘗
爲君努力傾百觴明日東西征路長

望日樓同揚登州張蓬萊看日出

日初出時一線橫表長可竟天有頃作方幅稜

角色深赤如丹砂已而燄如火外有絳帷浮動
眩目萬狀久之赤輪涌出厥象乃圓光彩散越
不彈指離海數尺其大如鏡其色如月矣

燭龍夜半開大荒羲和振轡嚴晨裝珊瑚十丈橫天出
乍看弦直忽已方動如萬馬颺朱旗爛如金屋堆琉璃
鮫綃齒蒼作帷幃髣髴見無端倪車輪燁燁從中躍
赤鳥飛起彩雲落光鉉倒射龍鼉宮扶桑枝冒蓬萊閣
客云日出光不同陰晴百變隨神工連朝霾霧今日霽
使君天許開鴻濛數言未畢日千尺翻如素月城頭出
天明萬里從此生安得長繩繫白日

蓬萊看海市歌